

Guðmundur A. Guðmundsson – Framboð til stjórnar HRFÍ 2014-2016



Ég hef verið félagi í HRFÍ og Retrieverdeild frá 2003 er ég eignaðist minn fyrsta hund, Labrador Retriever rakkann ISFTCH Kolkuós Dr. Finn. Ég hef frá upphafi verið virkur þátttakandi í veiðiprófum og annarri starfsemi Retrieverdeildar HRFÍ. Árið 2008 kom Labradortíkin Kolkuós Jökla Tinna á heimilið og nýlega bættust 9 hvolpar í hópinn. Ég hef verið í stjórn deildarinnar sex síðustu ár, var formaður í tvö ár og er nú gjaldkeri. Ég hef víðtæka reynslu af félagsmálum og hef gegnt fjölda trúnaðarstarfa. Síðustu 2 ár hef ég verið varamaður í stjórn HRFÍ.

Ég er líffræðingur frá Háskóla Íslands, með meistarapróf í vistfræði frá Durham háskóla í Englandi og doktorspróf í dýravistfræði frá Lundarháskóla í Svíþjóð. Ég hef m.a. sótt námskeið á háskólastigi í atferlisfræði, þroskunarfræði, almennri erfðafræði, stofnerfðafræði, þróunarfræði og tölfraði. Ég hef starfað sem sérfræðingur á

Náttúrufræðistofnun Íslands síðan 1992.

Ég býð mig fram til stjórnar HRFÍ því ég vil efla félagið okkar og starfsemi þess og sjá til þess að þörfum allra félagsmanna og hunda þeirra sé sinnt. Ég vil sjá breytingu á áherslum þannig að öllum ræktunarmarkmiðum sé gert jafn hátt undir höfði, en þar á ég auðvitað við heilsu, eðliseiginleika og skapgerð, auk útlits. Mér finnst stjórn HRFÍ leggja meiri áherslu á sýningar en annað starf í deildum félagsins. Ég ætla ekki að draga úr þeirri starfsemi sem nú er, heldur bæta öðru við.

Svo þetta sé unnt verður að auka lýðræði í félaginu og efla og styrkja starf deildanna. Til þess þurfa deildirnar aukið sjálfstæði í starfi og eigin fjárhag. Mikilvægt skref var stigið vorið 2009 þegar deildum var leyft að stofna bankareikninga, en því fylgdi engin fastur tekjustofn. Ég vil stuðla að hagræðingu í rekstri HRFÍ þannig að hluti félags- og skráningargjalda geti runnið til starfs viðkomandi deilda. Deildum væri þannig leyft að njóta stærðar sinnar og skapað fjárhagslegt sjálfstæði til eflingar starfsemi sinnar. Eigin fjárhagur og frelsi sem því fylgir yrði öllu sjálfboðastarfi sem fram fer hvatning og lyftistöng fyrir starfsemi allra deilda og þar með félagsins í heild. Við fengjum að sjá stærra viðburði, aukna útgáfustarfsemi, öflug námskeið og fjölbreytta fyrirlestra innlendra og erlendra sérfræðinga sem allir félagsmenn nytu góðs af.

Hlutverk stjórnar og skrifstofu á að vera að sjá til þess, með fulltingi deilda, að ræktunarmarkmiðum sé fylgt. Einnig að hagsmuna og þarfa félagsmanna og hunda þeirra sé gætt gagnvart yfirvöldum og stjórnvöldum. Stjórn HRFÍ á að hvetja og styðja deildir til eflingar starfsemi sinnar, en ekki letja. Fulltrúaráðsfundir eru mikilvæg samskiptaleið deilda og stjórnar og skal fulltrúaráð nýtt til ráðgjafar við ákvarðanatöku eins og lög félagsins gera ráð fyrir. Stjórn ber að virða samþykktir félagsfunda sem eru æðsta vald félagsins.

Aukum lýðræði - minnkum miðstýringu - eflum félagið OKKAR